

IRUÑEAN HASI ZEN ATZO GOIZEAN KORRIKA 11, ETA, ETENIK GABEKO JARDUNEAN, IPARRALDERA IRITSI ZEN GAUERDIAN

Hamaikagarren aldiz abian

■ Iruñeko Gaztelu plaza jendez gainezka izan zen atzo goizeko hamaiketan, lasterketa euskaltzalearen hasieran

■ Euskararen ofizialtasuna aldarrikatuz, lehen kilometroa Oinarriak taldeko kide batek egin zuen

■ Gauerdian zeharkatu zuen Izpegiko mendatea, eta Ipar Euskal Herrian sartu zen. Bertan emango du eguna gaur

Arantxa Iraola / Iruñea

GOIZEKO hamaiketan. Puntu-puntu hasi zen atzo Korrika 99 Iruñean. Hara joan zirenek hasiera paregabea eman zioten. Korrika abian hasi aurretik jada gainezka zegoen Gaztelu plaza. Bitartean, AEK-ko kideek urduritasun oro estali eta gogoz ekin zioten plazako kiosko gainean Korrika 11 aurkezteko hitzak esan eta aurtengo mezu sekretua lekukoaren barruan sartzeari. Bide batez, ohore eta esker oneko hitzak azaldu zizkieten aurtengo hamaika —zenbat bestela?— omenduei, bertan baitziren gehienak.

Kioskoaren pean, geldirik egon ezin zuen jende pilo zegoen. Dantzan zebiltzan batzuk, musika jotzen beste asko, danborrak astintzen bakarren batzuk... 11:00etatik aurrera guztiek zeregin bakarra izan zuten: lasterka egitea. Oinarriak taldeko Joxema Leitzaren atzetik —berak eraman zuen lekukoa aurrengo kilometroan euskararen ofizialtasuna aldarrikatuz— abiatu ziren guztiak. «Euskal Herrian euskaraz!» eta «Euskara hizkuntza ofiziala» leloak eztarria urratzeraino aireratu zituzten gehienek, eta kirol kontuetan iaotasun txikiena dutenen artean aurki iritsi ziren arnasestuak eta musu gorri-gorriak. Arnasestuka amaitu zuen aurrengo kilometroa Joxema Leitzak ere. «Oso luzea egin zait», zioen, urduritasunak —izugarri urduri baitzegoen— eta une horretako hunkidura bereziak hamaika hausnarketa sortu baitzizkion barruan.

Iparraldera, lasterka

Arnasestuak ez ziren aurtengo Korrikarentzat aitzakia izan, ordea. Iruñea osoa zeharkatu zuen, eta auzo, karrika zein kale kantoi gehienetan harrera paregabea egin zioten. Arrotxapean



JOXE LACALLE

Arrakasta osoz egin zituen Korrikak atzo lehen kilometroak. Argazkian ikus daitekeen bezala, jende andanak egin zuen bat.

Korrikako orporik dotoreenak

lekukoa

ARANTXA IRAOLA

Polita da lasterka ari direnen oinetakoei begira egotea. Zapatila zaharrak, mendiko bota handiak, korrika ibiltzeko oinetako berri eta distiratsuak... Horrelakoak dira asfalto gaineko borrokan jaun eta jabe. Tarteka, oso bestelako oinetakoak ikusten ziren atzo Iruñean, ordea. Lurra indarrez zanpatzen zuten oinen artean, orpo arin batzuk ikusten ziren, airosoak, dantzarako sortuak. Hamaikatxo bat emakume, takoizko zapatak zituztela ibili ziren lasterka. Bitxiak ziren Korrikan haien oinak. Bitxiak, halaber, haien arropak. San Jose eguna izaki, jaiegunetan ohikoak izaten diren jantziak zituzten soinean: beroki apainak, gabardina dotoreak... Gizonezko batzuk ere, itxura berezia zuten *kirolero* guztien artean. Ez lasterka

ibiltzeko zapatilarik, ez Korrikako elastiko erreibindikatiborik, ez buruko tximak lotzeko zintarik... Txukun aski lisatutako galtzekin egin zuten lasterka, larruzko zapata puntaluxeekin.

Andre-gizon horiek, dudarik ez, gutxiengo ziren atzo Iruñean. Gutxiengo izango dira, seguru aski, datozen egunetan ere. Hala ere, zirrara berezi bat pizten du haiek lasterka ikusteak. Irriz egiten dute lasterka, oihu handirik egin gabe, lotsatuta ia. Baina lasterkaldi horrekin, estereotipo orotatik haratago, ilusioa dagoela diote. Hala, datozen egunetan ere, takoidun orpoak, Korrikako orporik dotoreenak, lasterka ikusi nahi ditugu. Tipi-tapa, tipi-tapa, Korrika!

globo mordo batekin eman zioten ongi etorria: Euskalerrira Irratikoeek gorbataz jantzirik, Zizurren Ikurrina erraldoi batekin... Arratsalde partean, berriz, korrikalariak Iruñea utzi —Nafarroako hiriburuko azken kilometroa sindikatueta ordezkariek egin zuten— eta Ipar Euskal Herrirako bidea hartu zuten. Burlata, Atarrabia, Arre, Enderitz, Elizondo, Erratzu... Urrats berriak izan ziren etenik gabeko lasterketan, eta gauerdian, iragarri bezala, Izpegi zeharkatu eta Ipar Euskal Herriko lurretan sartu ziren. 2.250 kilometroko ibilbide luzean aurrengo kilometroak izan ziren. Abian da. Jende andanak egin du bat Korrikarekin.